

善本書室藏書志

善本書室藏書志卷十五

錢塘丁丙松生甫輯

子部一

家語十卷

明翻宋本

王肅注

前載王氏序後有吳郡黃魯曾序云藝文志有二十一卷王肅所注何乃至宋人梓傳者止十卷已亡其大半如由混簡錯喪則又不可分析比之王廣謀句解者又止三卷近何氏孟春所注則卷雖盈於前本而文多不齊余頗惜王肅所注之少播於世力求宋刻者校讐之僅得十之七八雖宋刻亦有訛謬者也案是書列入天祿琳瑯宋版子部前有肅序末載歲甲寅端陽望吳時用書黃周賢金賢刻攷四庫全書總目二十六家唐詩款亦同疑爲明末書賈而別無實證嘉靖本野客叢書亦

藏書志卷十五

一

有黃周賢名則此書當爲嘉靖三十三年所刊然書中祺字缺末筆避度宗嫌名似咸淳年間刻考咸淳無甲寅其槧法特精疑其源當出於南宋舊刊時用重爲影寫上版故祺字依舊缺筆卷端鈐有宋景濂圖書則書估妄加不足致辨末有道光甲午耕蘭氏從宋本再校益精美矣

孔子家語十卷

明汲古閣刊本

盧抱經校陳仲魚藏書

王肅注

毛晉先得北宋本二卷十六葉以前皆已蠹蝕閱十二年又得宋刻所逸僅末二卷儼然雙璧亟公同好凡王廣謀陸治兩刻均可覆瓿卽何孟春所注亦暗中摸索疵病甚多但刊其一序以備參攷盧文弨更以孫志祖校吳勉學本及以荀子說苑御覽北堂書鈔大戴禮淮南呂覽白虎通韓詩外傳史記索隱漢書等逐節逐字互相校正朱墨粲然每卷之尾記以日月及酬

應雜事卽羣書拾補中之底冊也前有宋本及百尺樓館讀仲
魚兔牀諸印

家語二十卷

明刊校宋本袁淑六藏書

王肅注本目錄八卷以上與宋本同卷九卷十則沿包山陸治
刻之舊卽毛晉謂其倒顛者也淑六以宋本校補頗善盧抱經
嘗以此刻校毛本朱筆記云有王弼洲序稱吳生刻吳不知其
名按天祿琳琅記吳名勉學字肖愚歙縣人

荀子二十卷

明刊本

唐大理評事楊倞注明後學虞九章汪震亨訂正

周荀况撰唐楊倞注其書大旨在勸學而其學主於修禮徒以
恐人特質而廢學故激爲性惡之說不免受後世詬厲然宗法
聖人誦說王道終以昌黎大醇小疵爲定評倞注多明古義亦
異不經之言虞九章王震亨皆杭人也

荀子二十卷

明世德堂刻本

唐大理評事楊倞注

周荀况撰前有元和十三年倞序版心上方標世德堂刊四字
顧千里云卽從元纂圖互注本出惟刪其重意然修身篇邱山
崇成句王制篇何獨後世也句下兩條猶未盡刪其二十卷尾
葉尙刻纂圖互注四字處抱經曰雖有脫譌差舛其本終未盡
失世德堂原刊老莊列荀楊文中六子此其分出單行之本版
刻印手極工

荀子二十卷

日本翻刻影宋台州本

登仕郎守大理評事楊倞注

按經籍訪古志云唐楊倞注首有荀子注序次新目錄接序後
每卷首題荀子卷第幾登仕郎守大理評事楊倞注卷末有劉
向校正目錄上言又有王子韶同呂夏卿重校銜名及熙甯元

年國子監劄子官銜十五人又有清熙八年唐仲友後序每半葉八行每行字數不整注雙行每卷有金澤文庫印愛日精廬有影寫宋呂夏卿大字本謂現存宋槧紙質破損字迹模糊轉不若影宋本之可貴此爲楊惺吾於日本得唐仲友刊於台州本卽仍熙甯之舊日本刊版之精模印之工似過影宋其亦如青取之於藍而青於藍歟未可以外域新雕而不登於目

孔叢子三卷

明刊本 翟氏藏書

漢太傅孔鮒著 裔孫毓圻毓挺校

前後無序跋有翟瀚之印棠村沈雨溥藏書印翟氏居吾杭東鄉瀚字蕓江晴江進士之昆弟行也沈氏設書肆於粥教坊人以睦親坊陳道人比之皆百餘年耆舊

新語二卷

明刊本 盧抱經校

漢楚人陸賈著

右新語爲道基術事輔政無爲辨惑慎微資質至德懷慮本行
明誠思務凡十二篇前有宏治壬戌華亭錢福序新語總評抱
經先生以程榮本校正如道基篇分苞燒殖殖改埴術事篇取
其致要致改至正夫改匹夫或訛爾心或改式輔政篇巧者近
亡亡改仁遇賢君者刑遇改遇辨惑篇秦王不能自信其自自
改曰異河而出河改門資執第七執改質有盧文弨字召弓抱
經堂印二方

新書十卷

明正德長沙刊本 彭文勤公藏書

漢長沙太傅賈誼撰

是書每葉十六行行十八字版心上下黑口前有正德九年菊
月都察院右副都御史長沙黃寶序云正德甲戌余致政家居
長沙郡守陸公以誼謫於長沙去今千有餘歲國朝旣崇祀享
之禮但所著新書獨無傳焉乃檢閱郡齋故槧中得版刻數十

片計其脫落尙多因詢於余余卽以舊得京肆鈔本補刻遂成
完書屬余爲序自宋淳熙辛丑提學漕使程公版刻之後三百
餘禩僅得一陸公補輯殘缺爲書再行是何寥寥知賞之難也
郎守名相字良弼宏治癸丑進士累官南京吏曹郎中英名偉
績有所自也後有淳熙辛丑日南至充潭州州學教授南昌胡
价原跋吉府右長史古燕楊節跋有南昌彭氏知聖道齋藏書
遇讀者善三印知聖道齋者南昌彭公芸楣藏書室也公名元
瑞字掌仍乾隆二十二年進士官至工部尙書 贈太子

太保諡文勤

新書十卷

明刊本

盧抱經校宋本

漢雒陽賈誼著

前有正德九年長沙黃寶序唐日休評語盧文弨手鈔李夢陽
序謂此書宋淳熙間嘗刻潭州淳祐間又刊修焉時已稱舛缺

盧於乾隆丙子以程榮本校己亥又以宋本改宋本作新雕賈
誼新書題梁太傅賈誼撰目後有建甯府陳八郎書鋪印一行
殆卽吳元恭所校之本也後補錄太傅小傳并撰書後一篇洵
可謂善本矣

賈太傅新書十卷

明正德漢省刊本

怡府藏書

柳陽何孟春訂注

前有正德十五年張志淳序後有周廷用序第十卷爲附錄列
弔湘賦鵬賦惜誓賦旱雲賦虞賦小傳及燕泉書識三篇抱經
先生云明正德年刻本題爲賈子與宋本相出入有欽遠猷者
合柳陽何燕泉本長沙本武陵本爲之審定去非從是其勤甚
矣然則此刻久爲藝林所重 國初曾入怡府故有明善堂安
樂堂兩印記別有張文桂印仲立二印似在未入怡府之前

鹽鐵論十二卷

明嘉靖刊本

漢汝南桓寬撰明雲間張之象註

寬字次公宣帝時舉爲郎官至廬江太守丞本始元年詔郡國
賢良文學問民疾苦皆請罷榷酤而鹽鐵卒不變及宣帝時寬推衍增
羊相詰難於是止罷榷酤而鹽鐵卒不變及宣帝時寬推衍增
廣著數萬言凡六十篇書惟鹽鐵爲名蓋惜其議不盡行也陳
振孫書錄直題作十卷且曰世之小人何嘗無才以熙甯日錄
言之王安石之辯雖曰儒者其實桑大夫之流也霍光號知時
務而鹽鐵之議乃俾先朝首事之臣與儒生議論反覆不厭是
非付之公論行否未有容心以不學無術之人而暗合乎孟莊
子父臣父政之義曾謂元祐諸賢而慮不及此乎可謂讀書有
識矣顧世鮮善本元明間僅數刻以新淦涂禎仿宋嘉泰槧本
爲最著此明嘉靖甲寅華亭張之象注本雖改舊第 四庫稱
其事實粗具梗概足備攷核前有之象自序

劉向新序十卷

明刊本

目錄後接曾鞏序每半葉十一行行十九字字畫清朗大似宋刻有九客館書畫印

劉向新序十卷

明刊本

何義門校

此書翻刊前版後有義門手書康熙庚寅四月借憩橋巷李氏所蓄陽山顧大有舊藏宋槧本初校焯記每卷前題陽朔元年二月癸卯護都水使者光祿大夫臣劉向上按士禮居藏書題跋新序云何校原本在顧澗養堂兄抱冲處係陽山顧大有所藏顧之前藏於憩橋巷李氏亦古書授受之源流有開子一印新刊劉向先生說苑二十卷

元麻沙小字本

前載南豐曾鞏撰序目錄後接護左都水使者光祿大夫臣向言所校中書說苑雜事及臣向書民間書誣校讐其事類眾多章句相濶或上下謬亂難分別次序除去與新序復重者其餘

者淺薄不中義理別集以爲百家後人以類相從一一條別篇目更以造新事十萬言以上凡二十篇七百八十四章號曰新苑皆可以觀臣向昧死有吳興好學爲福兩印

劉向說苑二十卷

明刊校宋本

山陰劉氏藏書

鴻嘉四年三月已刻護左都水使者光祿大夫臣劉向上

前有編校書籍臣曾鞏上序接目錄朱筆云宋本九行十八格上下黑口目錄後臣向昧死一條立節篇校添尾生殺身以成其信一句復恩篇晉趙盾舉韓厥條欲誅趙氏下多初趙盾在四字楚莊王賜羣臣酒陽虎得罪北見簡子兩條均不缺豈此本爲嘉靖何良俊所刊歟

纂圖互注揚子法言十卷

元刊本

晉李軌唐柳宗元注聖宋宋咸吳祕司馬光重添注

前列宋咸進法言表及序又司馬光序并渾儀五聲十二律圖

纂圖互注揚子法言十卷

元刊本

晉李軌唐柳宗元注聖宋宋咸吳祕司馬光添注

此書版式與前不同每葉二十二行每行二十四字槧印精美亦元時佳刻也

潛夫論十卷

明刊本

數間草堂藏書

漢安定王符著

抱經先生朱筆題曰乾隆丙子春三月以程榮本校朱墨校字無葉無之有文弼校正抱經堂二印

潛夫論十卷

明刊本

王符

塘西勞氏丹鉛精舍有金刻潛夫論卷端第一行但標王符二字爲錢蒙叟馮研祥藏本此雖明刻卷端題名亦祇二字黃堯翁士禮居題跋潛夫論以此本爲最古今去刻留校心事可知

幸月霄二兄祝明刻如宋本物得其所於心稍安愛日精廬藏書志云嘗取是本校程榮本改正頗多氏姓篇尤甚則潛夫論自宋槧外是本最善此冊因非堯翁歸月霄之本然攷之吾里瞿氏藏書記云此乃明人重刻宋本今以新安程本相較如三式篇稷卨不誤稷禹德化篇祗夫不誤祗礪氏姓篇賜禹姓姒氏不誤似氏則不能故也不誤改也王孫氏不誤五孫氏蓋須胸之女也不誤言也略舉其一足徵舊本之可貴按之此冊字字不誤

潛夫論十卷

影宋本

述古堂藏書

王符

每葉二十行行十八字每卷篇目後接正文末有朱題云戊子六月得沈與文所藏宋版翻刻本因命工影鈔此書繆誤頗多無從改定借筆點定一次殊失句讀後之讀者勿哂七月初三

日默庵老人書前有題云潛夫論時本不可讀此乃影鈔宋本者馮已蒼詳識於其末校對亦精須珍之曾經稽瑞樓楊芸士哀漱六諸家藏弄圖章鼎繁

申鑒五卷

明嘉靖文始堂刊本

吳郡黃省曾注

漢荀悅撰悅字仲豫爽之從子後漢書附爽傳獻帝時仕至祕書監侍中志在獻替謀無所用從弟陵北海孔融前後死賊手勢益孤是書之作意固有在省曾感其所遭適有奸臣心迹如曹操者竊弄威柄遂憤激而爲注自爲之序武英殿大學士王鏊柳陽何孟春喬宇並有序跋

申鑒五卷

明刊本

盧抱經校藏

漢潁川荀悅著

前有明正德十四德吳郡王鏊序後抱經手錄黃省曾序并朱

筆記云乾隆二十一年三月甲戌盧文弨以程榮本校又眉問一記云本欲補錄全注於後以其注釋人尙易知故中輟但節錄注語而已

徐幹中論二卷 精鈔本 黃薺園藏書

論凡二十篇魏志文帝稱幹著二十餘篇世傳者非全也末有齊都賦一篇曹植劉楨贈詩各一首始後人增輯幹字偉長北海人前有序而無名氏宋山陰石邦哲有題識一條元陸友仁得之錢塘仇仁近爲後跋明都穆有重刊跋嘉靖乙丑青州知府四明杜思又刊并錄青州志儒行記有黃不烈印薺園二印中說十卷 元刊本

隋王通撰阮逸注

此書爲通子福郊福時等所依託書凡十篇曰王道天地事君周公問易禮樂述史魏相立命關朗前有阮逸序云正觀二年

御史大夫杜淹始序中說及文中子世家未及進用及長孫无忌所抑而淹尋卒故王氏經書文多殘缺誤以杜淹所撰世家爲中說之序又福時於仲父得關子明傳疑因言關氏卜筮之驗且記房魏與太宗論道之美亦非中說後序也蓋同藏細帙卷目相亂遂誤爲序焉逸家藏古編尤得精備亦列十篇實無二序以章詳測文中子世家乃杜淹授與尚書陳叔達編諸隋書而亡矣關子明事具於裴晞先賢傳今亦無存故王氏諸孤痛其將墜也因附於中說兩間且曰同志淪俎帝閑悠邈文中子之教鬱而不行吁可悲矣此有以知杜淹見抑而續經不傳諸王自悲而遺事必錄後人責房魏不能揚師之道亦有由矣右爲敬忍居刊本有瞿良印讀書養氣兩印

中說十卷 元刊黑口本

題阮逸注

前逸序已失每半葉十二行行廿六字亦坊刊視前刻多譌字
文中子中說十卷

明刊本 霍氏藏書

阮逸注

此本有文中子纂事年表較宋本多釋音銅川不盡誤銅川蓋
元時坊刊者恬裕館宋所藏同爲此刻

中說二卷

明刊本 數間草堂藏書

隋龍門王通著

此書無阮注前有阮逸序後無文中子世家等五篇盧抱經乾
隆甲戌以阮逸注本校補卷首有數間草堂藏書白文方印文
昭校正朱文方印

家範十卷

明刊本 金元功藏書

宋司馬光著

家範古刻罕見此本每半葉九行行十八字每葉下紀字數頗

有宋槧遺模前後無序跋不知何時何人所梓有金元功藏書記一印元功太倉州人南樓書籍儲藏最富今則散於雲煙矣宋司馬溫國文正公家範十卷

明萬厯刊本

與宋史藝文志文獻通攷著錄均合首載易家人卦辭及節錄大學孝經堯典詩思齊篇語以爲綱領其後自治家至乳母分十九篇皆雜採史事可爲法則者間參已論與朱子小學體例小異而節目簡要似較小學更切於日用明萬厯間陳侍御世寶巡視東南河道復爲鉉梓知東昌府莫與齊馬巒馬化龍並爲序跋溫公十六世孫祉十七世晰皆序述祖志而頌侍御之德意吾杭南山慧日峯有溫公磨崖隸書家人卦與此猶見公修己型家之梗概也天啟丙寅司馬氏刊本在此後

河南程氏遺書二十五卷附錄一卷外書十二卷經說八卷明道文集五卷伊川文集八卷附錄遺文三卷

明成化刊本

少保兼華蓋殿大學士南陽李賢校正國子監監丞伊洛閻禹錫重輯翰林院編修泌陽焦芳重校南陽知府太原段堅校刊

前有成化元年九月柱國少保吏部尙書李賢序曰今去二程四百餘年學者不見二程全書天下缺事無大於此國子監丞閻禹錫惓惓訪求二程遺言盡得其書而集之欲梓以傳求予爲序禹錫二程故里人予亦忝在鄉邦云成化八年季夏監察御史前國子監監丞閻禹錫後序曰程氏遺書二十五卷外書十二卷俱出程門弟子手記朱子家藏類訪旁搜先後爲之者也伊川經說八卷其目見近思錄其書見時氏本亦無餘論矣獨二程先生文集十三卷出胡文定公家頗有改削今因朱子所改定者皆兩存之宋淳祐間四書已版行歲久湮沒予訪求二十餘年訖無完本後官太學始掇拾於太師南陽文達李公家復幸觀閣本乃與泌陽焦君孟陽日夕印校今吾友萊州郡

守金城段公服闋謁選改守南陽願錢梓以廣其傳成化十二年知南陽府事段堅又爲跋此刻宋元之後可稱最古獨焦芳名在姦臣傳可謂四賢一不肖者矣

二程全書六十五卷

明宏治刊本

河南布政司右參議武定康紹宗重編

是書爲二程子門人所記朱子編次之成二十五卷益以行狀表譜一卷時爲乾道四年又慮或有所遺更採擇門人集錄成十二卷目曰外書涵祐間教授張玘合經說文集刊行號程氏四書猶各自爲書及明天順間國子監丞閻子與重刻之南陽李文達題曰二程全書此宏治戊午監察御史李瀚以舊藏本與閻本屬參議康紹宗僉事彭綱編校河南知府陳宣刻之有朱子二跋及李瀚等序前列程太中公明道純公伊川正公三像

公是先生弟子記一卷 小山堂鈔本 張綺堂藏

宋劉敞原甫撰

是書雍乾間趙谷林意林兩徵君鈔本也後有宋乾道時謝諤江溥溫熙間趙不黯三跋卷首有汪魚亭藏閣書朱文方印

童蒙訓二卷 明覆宋本

呂氏本中居仁撰

前有樓昉序作於宋嘉定八年稱金華太守邱公壽詩刻於呂氏祠堂末又刊紹定己丑郡守眉山李直得此本於詳刑使者刊東萊呂公祖烈因鈔本於玉山堂按紹定己丑去嘉定八年相距十有四載李殆取邱刊翻刻此又翻於李本者也本中壽州人官至侍講不附秦檜罷爲提舉太平觀謚文清昉號迂齋鄞縣人幼從呂祖謙學紹熙中登進士第

文公先生小學明說便覽六卷 元刊本 翁羅軒藏書

後學餘姚夏相纂輯松陽門人京兆劉刻音校

前有文公小學書題及題辭十節更列弟子受業之圖至矜箠
篋笥樞橈圖凡五十有四與四庫本家山圖書相合惟缺首
葉石小學本旨一圖提要引讀書敏求記云家山圖書晦庵私
淑弟子之文蓋逸書也李晦顯翁得之於劉世常平父劉得之
於魯齋許文正公其書以易中庸古大學古小學參列於圖而
於修身之旨歸綱領條分極詳此本惜不多覩道學家宜刊傳
之錢曾所藏舊本無從踪跡惟永樂大典尙載原文茲獨附小
學之首與閣鈔家山圖書對看賴以補正甚多夏相餘姚志無
其名經籍志亦無其目卷首有翁嵩年字康飴朱文楷圓印嵩
年號羅軒仁和人康熙戊辰進士歷官刑部郎中老屋在學官
巷卽孫氏壽松堂寒舍相距甚近今幸得遺籍能無動梓桑恭
敬之念乎

小學集說六卷 明刊本

後學涓安程愈編

前有成化二十二年自序云奉命分理河道於濟暇取小學參攷諸家之注間有不能無疑欲會通其說幸得濟人李晦之李繼宗相與研究眾說之精當而不拂乎本義者隨錄以爲集說前列總論凡例按 閣本著錄者爲陳選集注本先有吳訥集解其後有李德用李多見重雕亦入藏書家目錄顧不及程愈致愈字節之號味道涓安人成化辛丑進士都水司主事督濟河道治水利邊方入貢有異志至大同宣示德威卒效順擢山東參議適閩里聖廟災董工營造祠鄉賢是書正刻於督濟河時也與天台陳士賢同時所編惟字句稍有不同耳

朱子語類大全一百四十卷

明成化依宋咸淳刊本

葉氏葉竹堂

宋導江黎靖德類編

是書每葉二十八行每行二十四字明翻宋槧也前有黃幹池州刊本序李性傳饒州刊續錄序蔡抗刊後錄序吳堅建安刊別錄序黃士毅分類語錄序及跋木跋魏了翁眉州刊本序蔡抗徽州刊版序王泌刊續錄序次姓氏次門目目錄後有靖德景定癸亥書咸淳庚午再書次攷訂書久散逸成化九年安成彭時序曰文公傳注成言固已家傳人誦矣一時門人進而請益退而各記所聞如此者殆百餘家蜀士李道傳始取而刻之爲語錄莆田黃士毅又因而類分之曰語類語錄之外有續錄後錄別錄語類之外有續類諸書並行錯出讀者病焉最後黎靖德參校諸書去其重複謬誤因士毅門目以類附焉名曰語類大全凡一百四十卷三山陳君煒自天順庚辰第進士爲御史屢欲訪善本而不得成化庚寅憲副江右訪於豫章胡祭酒顧庵家得印本中缺二十餘卷明年分巡湖東又於崇仁吳聘

君康齋家得全本遂梓其書厥後版闕又補刊成有葉氏萊竹堂藏書圖印

胡子知言六卷附錄一卷疑義一卷

舊鈔本

前有門人廣漢張栻序目錄後有吳儆真德秀兩跋後宏治三年新安後學程敏政謹題云新安千戶千侯文遠之子應見予之惓惓於斯也爲刻梓傳焉又有嘉靖五年正心書院題跋成化二年金華陳相序按胡宏字仁仲建甯崇安人安國次子初以賸補右承務郎不調秦檜當國貽書其兄寅問二弟何不通書意欲用之宏書辭甚厲人問之正恐其召故示之以不可召之端檜死宏被召竟以疾辭張栻謂其言約義精道學之樞要制治之著龜也

少儀外傳二卷

精鈔本

宋呂祖謙撰

是書有嘉定癸未雲谷胡巖起跋云子夏之門人小子灑埽應對進退而子游以爲末不知灑埽應對進退卽精義入神之妙而欲二之則過矣東萊先生少儀外傳學者終身行之猶懼不及而曰少儀云者謂時過則難學而少成若天性故欲自童丱而習之庶幾趨嚮蚤正氣質易成又紹熙二年呂祖儉跋云先兄此編之意蓋以始學之士徒玩乎見聞泊乎思慮故指其前言往行所當知而易見者登之於策使之不待攷索而自有得於日用之間丹陽郡文學譚元猷儉之同舍生也欲刊其書於學宮因識卷末書久湮沒館臣輯自永樂大典中

龍澤論說集錄十卷

精鈔本

宋呂喬年編

此呂成公門人集錄其師之經說及史說雜說弟祖儉裒輯成編從子喬年復附益次比以刻之有後跋其詩說獨曰拾遺異

於他經說者以有讀詩記故也雜說多講學語成公學本程子
論說醇正體用兼備故朱子引之同纂近思錄宋史藝文志作
麗華論說集者誤宋呂氏原刊成化壬辰鉅鹿耿裕重梓於國
學此精寫本也

潛室陳先生木鐘集十一卷

元刊配鈔本

宋陳埴撰埴字器之永嘉人舉進士授通直郎自題曰善問者
如攻堅木善待問者如撞鐘因命之曰木鐘此卷四至六卷九
至十爲元刻小字本餘均配鈔

重刊木鐘集十一卷

明宏治刊本

宏治十四年温州府知府吉水鄧滙序曰體予心而刻之者瑞
安令高君賓也賓江陰人有後序

類編標注文公先生經濟文衡前集二十五卷後集二十五卷

明萬
曆妻

宗後學高安朱吾弼命刻十三世孫朱崇沐校梓

是書取朱子語錄文集分類編次前集論學後集論古尙有續集則補二集所遺也黃氏千頃堂書目稱爲馬季機編乾隆間程恂則稱爲宋滕珙編珙字德章號蒙齋婺源人與兄璘並遊朱子之門二者相較似以滕編爲近明正德辛巳初經雕版楊一清有序此則第二刻也有萬歷丙午朱吾弼序稱紫陽遺文亦多在閩閩董公崇相出家藏善本授余余同嘉孫公李公協意錢梓朱生崇沐慨然身任力闡先傳因屬王生吳生專力校讐云按孫爲御史沁水孫居相李爲御史內鄉李雲鵠王名正已吳名伯與續集二十二卷闕

西山先生眞文忠公讀書記殘本一卷

宋刊本 汪魚亭藏書

眞文忠讀書記原本分甲乙丙丁四集今惟存甲集三十七卷乙集二十二卷丁集二卷此祇丁集之一卷所論爲出處之義

每葉十八行行十六字註文夾行行二十四字有禮部官書長
印按藝芸精舍宋元版書目存丁二卷當同出一版先是刊甲
乙二集於三山學官番陽湯漢爲序是集疑亦福州所雕天
祿琳瑯所收宋版通鑑紀事本末元版春秋諸圖統記俱有禮
部官書朱文長印以明史永樂四年命禮部尙書鄭賜訪購遺
書或當時被採之書而鈐以官印歟有汪魚亭藏閱書一印
讀書記乙集上大學衍義四十三卷

宋刊本

右爲南宋刊本半葉十行行二十字卷首標讀書記乙集上可
知當日併刻甲集之後矣前有德秀自序又進大學衍義表結
云撰到四十三卷并目錄共成二十三帙用黃羅夾複封全謹
隨表上進以聞又尙書省劄子又申中書門下省時政記房狀
有曾藏洞庭王苞生書樓張勳珍藏兩印

西山先生經進大學衍義四十三卷

明宏治刊本

右宋眞德秀大學衍義四十三卷前有德秀自序進書表尙書省劄子中書門下省時政記房申狀宋槧西山讀書記乙集上卽爲是書此明宏治刊本削去讀書記乙集上六字耳每半葉十一行行二十二字凡提行款式一仍宋本之舊惟自注加以註釋殆後人增益者卷端有呂氏藏書之記一印

大學衍義四十三卷

明嘉靖刊本

西溪朱氏藏書

宋儒眞氏德秀撰

明之世宗亦宋之理宗也嘗命經筵輪講是書一時溫仁和桂萼張璁董玘徐縉顧鼎臣之外又增穆孔暉嚴嵩張璧許成名張潮謝丕六員逢三八日日直二人且命司禮監重刻以傳嘉靖六年親製序文少師楊一清爲後序端楷精刊卽是帙也有西溪朱氏藏書小印朱氏家藏寶傳貽厥樓三印

心經附注四卷

舊鈔本

右宋德秀撰明程敏政附注前有白序凡輯尙書一條詩二條
易五條論語三條中庸二條大學二條樂記二條孟子十二條
周子二條程子一條范氏一條朱子三條自爲贊語每條各加
以注且以書未賅備又注中或稱西山讀書記疑非德秀自作
更補爲附注標明白文目錄下有端平元年顏若愚識而四
庫本獨缺顏跋若愚無攷福建通志泉州教授亦無其名

先聖大訓六卷

明萬厯刊本

宋明州楊簡輯并注明後學鄭光弼俞汝楫訂

前有目錄凡五十五篇有敬仲先生序又有萬厯乙卯雲間張
翼軫吳門陳其柱兩序蓋刻於慈溪者也字大豁目未覩別本

慈溪黃氏日鈔分類九十七卷

精鈔本

慈溪黃震東發編輯

至元三年四月廬江沈達序黃東發氏尊信周程朱子之說以

上探孔孟六經之旨一切反之躬行以爲實用言論氣節千載有光斯可謂不負所學者矣暇所閱經史諸書隨手攷訂并奏劄申請勸誡等作凡百卷名曰日鈔鈔梓行於世中值兵燹諸孫禮之懼祖訓之失墜購求搜輯補刻僅完屬余序之缺十二至十五四卷以刻本補之有曹秉鈞印曹氏仲樞兩印

北溪先生字義二卷附嚴陵講義一卷

明宏治刊本

門人清源王雋編

先生氏陳名淳臨漳人從朱子二十餘年退加研泳周程張朱之論而爲此書凡二十五門決擇精確貫串浹洽溫陵諸葛珏來莆恨相見之晚謀之永嘉趙崇端鋟版莆田陳宓爲序明宏治間林同周季麟重刊同爲後跋

東宮備覽六卷

精鈔本

宋祕書監正字陳模撰自始生入學立教師傅講讀宮僚擇術

廣誨講習主器正本問安友悌戒逸崇儉辨分正家規諫幾諫
監國二十門皆有裨儲德卷首有改官省劄告詞各一道經進
表一篇進東宮備覽序進備覽後上宰相劄子二篇末有後記
云益於公有先世舊且辱公之知近出別稿以示因請授木以
衍其傳益不知姓氏豈吳郡王耶師宋樓藏書記缺進備覽序
及上宰相劄子兩篇彌見此帙之全

集語二卷

明刊本

永嘉辭據纂

前有清祐丁丑叔容氏自序乾隆間衍聖府刊本極精有景定
元年中書省看詳一篇暇當補錄

傳道四子書八卷

影寫元刊本

吳郡後學徐達左編次

其書引經子諸說編顏曾思孟四子各分內外篇二卷各爲小

序前有至正庚子三月達左自序云顏子聖門高弟惜乎不壽又不授徒故無書之可傳曾子雖有書十篇蓋後人蹈襲不得其守約一貫之旨子思有中庸孟子有七篇雖聖賢之道不外乎是尙有言行見於傳記亦足觀也宋儒劉子澄嘗編曾子而世變湮沒國初李純仁亦編顏子而未舉其要愚不自揆每檢羣書得四子之嘉言善行日鈔月積會粹成編云達左字良夫理學類編八卷

明嘉靖益府本

臨江後學張九韶美和編輯

卷端載編輯大意引用先儒姓氏書目及綱目至正丙午九韶自序洪武甲子孫張拱誌嘉靖壬寅勿齋益王重刊序王諱厚進高皇帝六世孫憲宗第四子後序爲宣德癸丑三衢汪賓撰先一刻爲成化辛卯掌淮安府事河南布政參政仁和楊景序後一刻爲七世孫克文堯文刊有臨川吳當序

性理大全書七十卷

明內府刊本

前有永樂十三年十月初一日御製序文繼列先儒姓氏自周程以次迄黃氏潛凡一百十有八更列奉敕纂修諸臣銜名自胡廣楊榮金幼孜以下又三十九人又進書表文及目錄版印寬大裝潢精緻猶勝國之道有正定梁氏太谷孫氏家藏諸印性理羣書集覽大全七十卷

明刊小字本

後學瓊山王峯道人集覽青田養浩通叟訂定雲間林泉處士校正

前有永樂十三年十月初一日御製性理大全書序大學士胡廣翰林侍講楊榮金幼孜等進書表及目錄引用姓氏奉敕纂修諸臣銜名每卷後有後學東甌雙清軒徐天章繕寫或謄錄一條刻作巾箱本殆麻沙坊賈所爲也

居業錄八卷

舊鈔本

古吳陳維立延陵張靜涵千越王臣欽古番嚴敬中刊訂

右明餘干胡居仁著闢性理經學以及制度事功凡八門文敬游康齋先生之門與鄉人婁一齋羅一峯張東白爲會於弋陽之龜峯厯主講席淮王聞之請講易於其府嘗曰以仁義潤身以牙籤潤屋足矣前有陳維立懋德張靜涵有譽兩序有張興載印待攷

顏子一卷

明刊本

周雪客藏書

潘府校集

府字孔修上虞人成化末進士厯長樂知縣廣東提學副使以母老乞休嘉靖改元起太僕少卿改太常致仕屏居南山惟以發明經傳爲事明史入儒林傳有孝經正誤一卷又孔子通紀八卷潘氏道萃錄是書未收四庫並不列存目惟千頃堂書目載此云上下八篇輯經傳所載爲正文別引雜說附於下凡

三十一章前列顏子世家附識云徐氏四子皆立內篇外篇雖輕重略分猶以聖賢經傳與莊列荀揚之流論衡琴操之類表裏對舉殊失崇黜之意外傳所以不立也又云徐氏通編四子惟李氏獨編顏子此書亦如李氏而不及曾思孟三子云云有櫟園周氏藏書周雪客家藏書兩印雪客名在浚祥符人櫟園先生長子也

白沙先生至言十卷

明刊本 棟亭曹氏藏書

嘉靖二十六年門人湛若水謹序曰至言何爲者也言之至者也斬白沙陳先生之至而爲之以示人約者也曰言何以爲至也言由中出者也本乎其自然者也有欽訓堂書畫記長白敦棧氏堇齋昌齡圖書印棟亭曹氏藏書諸印

道一編六卷

明刊本

右宏治二年新安程敏政撰敏政字克初休甯人成化丙戌進

藏書志卷十五

九

士官禮部侍郎合朱陸兩家之言以證其同附以諸賢論贊前有自序末有門生祁閻李信後序 四庫入附存目錄

文華大訓箴解六卷

明刊本

明憲宗成化十八年十二月以御製文華大訓二十八卷賜皇太子嘉靖八年世宗御製序文頒行廖道南謹按其篇章前爲之序次爲解爲箴嘉靖十九年正月表以上進 四庫館因書係殘本僅存三卷列之存目此本六卷卷一進學篇分明典訓窮義理資啓益擇習尙四端卷二養德篇分端心志謹言勤慎服食戒逸欲四端卷三厚倫篇分隆孝敬悖友愛重內儀睦親戚四端卷四明治篇分敬天命嚴祀典辨才人待臣工四端卷五明治篇分恤民隱崇教養正禮樂審聽納四端卷六亦明治篇分公賞罰制財用飭兵戎馭四盜四端與千頃堂書目所載卷數符合

蠶菴雜述二卷

舊鈔本

瑣川吳氏藏書

海昌朱朝瑛康流氏著

朝瑛字美之崇禎庚辰進士官旌德知縣其學出於黃石齋此書所論經義理學多主數以言理旨頗湛深有瑣川吳氏收藏圖書汪魚亭藏閱書兩印

性理大中二十八卷

稿本

卷首有錢塘後學應搗謙自序云性理大全一書永樂間諸儒所輯先賢之格論余向者不揣曾修序之顏爲大中尙有關略焉越六年在臨平閒居無事手訂成書以爲聖人之道從此以入必可達也後列凡例七條引載先儒姓氏及目次鈔字精整始終不苟搗謙字潛齋明諸生居威乙巷爲杭州理學大儒藏之以志敬恭

右儒家類

子部二

孫子集注十三卷

明嘉靖刊本

右爲宋吉天保輯案注集魏武梁孟氏唐李筌杜佑杜牧陳皞賈林宋梅堯臣王皙何延錫張預十一家之說卽宋志所稱孫子十家注也而宋樓藏書志有明刊十卷本序失名氏刻於萬厯己丑此爲十三卷序則嘉靖乙卯錫山談愷督軍虔臺進武弁及生儒問之無有知是書者故授之梓則刊在萬厯之先矣

十一家注孫子十三卷

鈔道藏本

前有孫子本傳又孫子遺說一卷滎陽鄭友賢序嘉慶二年孫星衍校刊於兗州觀察署卽從此本出也多孫子兵法序魏武帝策

尉繚子直解五卷

明初刊本

祁氏淡生堂藏書

前辛亥科進士太原劉寅解

學經室外集載尉繚子 四庫全書已著錄直解明劉寅撰寅
嶧縣人洪武辛亥進士所撰書皆名直解見林泉筆記此七書
之一每篇下各有小序發明其義注中所論多精密處如注威
戰篇妙勝之論云卽孫子所謂未戰而妙算勝者得算多也于
受命之論云卽太公論立之義于踰垠之論云卽太公所謂越
江河渡溝塹之義寅以兵家言注兵書猶儒者之以經注經也
惟于天官篇刑德之說而不用淮南子天文訓凡用太陰左前
刑右背德及兵略訓注刑謂十二辰德十日之語又將理篇云
婿父曰婚女父曰姻而不引爾雅婿之父爲姻婦之父爲婚未
足爲據然瑕瑜不相掩也此冊有山陰祁氏藏書之章澹生堂
經籍記贖翁手識子孫世珍諸印

三略直解三卷

明刊本

汪圓源藏書

前辛亥科進士太原劉寅解

寅有六書直解二十六卷惟此一種收入 四庫是書大旨出於黃老務在沈幾觀變先立於不敗以求敵之可勝寅謂三者上中下三卷略者謀略也分節詮解頗能發明其義又能參校諸本注其異同成化嘉靖間遞有總刻本此猶洪武時初刊有黃丕烈汪士鍾兩印

六韜直解六卷

明初刊本

祁氏澹生堂藏書

前辛亥科進士太原劉寅解

寅有引云六韜者文韜武韜龍韜虎韜豹韜犬韜凡六十篇韜之爲言藏也按漢藝文志周史六弢六篇師古曰卽今之六韜也蓋言取天下及軍旅之事注言周史生於惠襄之間或曰生於顯王時藝文志有太公二百三十七篇謀八十一篇言七十一篇兵八十五篇注云尙父本有道者或者近世有以爲太公術者所增加也漢興張良韓信序次兵法孝成時任宏論次兵

書俱不載所謂六韜者唐李靖獨言張良所學太公六韜三略是也豈六韜三略其先本太公遺書周史黃石公推演而增加之歟曰謀曰言曰兵六韜中俱有之豈後人刪取要用止存此六十篇歟今皆不可攷姑卽其文而爲之直解云右武經七解之一阮文達公亦未進呈也此本明初所刊有山陰祁氏藏書之章澹生堂經籍記曠翁手識子孫世珍諸印

武經總要前集二十卷後集二十卷

舊鈔本

前有宋仁宗御製序曾公亮丁度奉敕編前集制度十五卷邊防五卷後集故事十五卷占候五卷宋時東都兵制可以攷見明刊有小字本此則精鈔也

武經直解二十五卷

明萬曆刊本

前辛亥科進士太原劉寅解

孫武子三卷吳子二卷司馬法三卷唐太宗李衛公問答三卷

尉繚子五卷黃石公三略三卷六韜六卷前有讀法一卷凡例一卷陳圖一卷國名一卷附錄一卷嘉慶間儀徵阮氏元僅得司馬法尉繚子兩直解進呈見之學經室外集此則七經之全解也洪武戊寅寅自序稱洪武三十年太祖高皇帝有旨俾軍官子孫講讀武書通曉者臨期試用寅觀孫武舊注數家矛盾不一學者難於統會吳子以下六書無注市肆版行者闕誤又多因取其書刪繁撮要斷以經傳所載先儒之奧旨質以平日所聞父師之格言譌舛者稽正之脫誤者訂增之幽微者彰顯之傳會者辨析之明年彙就又明年書成又取先聖先賢所著有切於兵法者編爲附錄以取童蒙誦習之便云云成化二十二年都察院左副都御史襄城李敏序云余與張公懋會攷見武生讀誦者皆市肆版行孫武舊注間有不明吳子諸書尤多舛謬張公患之乃出其家藏拱辰劉先生武經直解示予注釋

詳明引據切當不待師傳而自會其意誠兵家之寶也清苑王
琮校正繕寫監察御史趙英刊行萬曆九年巡撫山東都察院
右副都御史內江何起鳴又屬副使賈仁元知府莫與齊重刊
而序之

元戎濟陣風雷集不分卷 鈔本

前有永樂十年東甯焦玉自序云予少涉獵儒書精研將略一
日遊天台上清玉平洞天遇道士以師禮事從游三年自號止
止道人授火攻一冊別後不知所之乙未太祖高皇帝起兵和
州渡江取采石太平子按制火龍鎗上獻上命徐達試之洞透
層革語多依託中有新安胡公平倭一語豈有預知嘉靖間事
惟分重地固守山險攻戰細作劫營撓扶平陸攻戰野戰交鋒
黑夜白晝步戰馬上攻戰夜戰燒船焚筏萬騎攻敵鋒埃防守
各門各器并水陸防守分形式二十七款及火藥方殆如讀書

敏求記中之火器大全火龍萬勝神藥圖相類之書

張氏集注百將傳殘本八卷

宋刊本

是書爲宋張預撰。程安道注。預字公立。東光人。安道字居仁。安陽人。凡採歷代名將百人。各一卷。始於周太公。終於五代劉鄩。先敘履貫。繼列戰績。參引史論。別以孫子兵法題其後。蓋欲述古以規時也。今百卷之中。僅存五十九之六十三。又八十九之九十一。共八卷。有汝川孚庵一印。頗舊。惜無從攷。

十七史百將傳十卷

明刊本

東光張預公立集

前有預進書序云。臣觀歷代史書。上下千餘載間。將兵者所以成所以敗。莫不與孫武之書相符契。因集古之所謂良將者。得百人。以其傳集成一書。分爲十卷。以太公爲首。而其次則以年代題曰百將傳。凡史辭泛漫而不切於兵者。一刪去之。非兵略。

而可以資人之智慮者固亦存焉先以孫子兵法題以行事合之參校其得失學者觀此不獨簡而易習明而易曉抑亦知孫子之書不爲空言矣按此書 四庫入存目

懼謀錄四錄 寫本

崑山顧炎武甯人氏錄

此書前後無序跋亭林先生亦未聞著是書其姓名下署錄字豈當時手錄他人之作歟第一卷爲知彼知己致人不致於人伐交警敏先聲兵勢地勢當敵死戰窮追詭道掩襲憑城覘敵攻橋遊戲第二卷爲虛聲受降深入救敗探掠合刃惡鬪擊虛鈔後橫冲奪氣設伏身先援師移營攻營圍師第三卷爲遊軍半渡夜劫勇決有備攻瑕攻堅乘毀出奇守城攻城第四卷爲爭利勞之誘之誤之分之散之懈之用間先發壓營知眾情謀定決機分數事機多算和克智決攻心伐謀諸目而各引古人

遺事以證之目錄後有小篆文記嘉慶十六年鈔竣二條通部朱
筆勘點惜不知出誰手耳

右兵家類

善本書室藏書志卷十六

錢塘丁丙松生甫輯

子部三

管子二十四卷

明成化刊本

錢遵王藏書

唐司空房元齡注

陽湖孫星衍曰漢藝文志道家經子八十六篇與今本篇數合
惟有亡篇耳隋經籍志作十九卷舊唐志作十八卷今本十九
卷終地員第五十八弟子職第五十九疑隋志無後數卷郡齋
讀書志云劉向校八十六篇今亡七篇五十八篇有注解玉海
云今本房元齡注五十八篇有注是房元齡所見本亦即隋唐
十九卷之書也文獻通攷引崇文總目云吳兢書目云形勢篇
而下十一卷亡今本崇文總目無此文玉海引吳氏西齋書目
三十卷此自形勢解下亡足證唐已前竟無第二十卷已下形

勢解諸篇今本此諸篇注亦較少但文甚古雅疑亦非後人撮
拾增補者豈卽解五十八篇之辭如韓非解老之屬原本本附
已上各篇乎又按史記正義引七略云管子十八篇在法家此
七錄字誤史記索隱云案今管子書其封禪篇亡明朱東光本
封禪第五十下注云元篇亡今以司馬遷所載管子言以補之
是知封禪篇爲房氏所補吳勉學本無注亦不注明此篇元關
後人遂不能知此書宋元本絕少而傳注所引本文又有不見
於本書者當俟攷定是本前無序目微淵如觀察所書幾不知
爲朱東光所刊者末有康熙五年四月常熟陸貽典識云毛斧
季以善價購得錫山華氏家藏宋本錢遵王貽余此本竭十日
之力校勘一過頗多是正時賦役倥傯愁悶填胸當研朱點筆
時大似聽秋誨弈一心以爲鴻鵠之將至撫已爲之一笑也有
虞山錢曾遵王藏書印

管子二十四卷

明刊本

唐司空房元齡註

此趙文毅同韓非子合刻本前有萬厯壬午用賢自序又列劉向錄上及管子文評管子凡例目錄每卷仍載篇目接本文按陸敕先有宋本卽毛斧季舊物錢遵王影寫有張嶠跋末有木記曰瞿源蔡潛道墨寶堂新雕印爲南宋末年所梓黃堯圃有大宋甲申秋楊忱序本附張巨山讀管子一篇定爲紹興隆興間刻文毅刻本卽從楊序宋本而出記此備攷

鄧析子二卷

明刊本

前有劉歆進書序曰鄧析者鄭人也好刑名操兩可之說設無窮之辭當子產之世數難子產之法或云子產起而戮之於春秋左氏傳昭公二十年而子產卒子太叔嗣爲政定公八年太叔卒駟歆嗣爲政明年乃殺鄧析而用其竹刑君子謂子歆於

是乎不忠苟有可以加於國家棄其邪可也竹刑簡法也久遠
世無其書崇文總目引漢志二篇即無厚與轉辭是也近江山
劉氏覆刊宋本一聲而非罵勿追一言而忽罵不及此本罵字
俱作駟馬又敬慎致咎闕筆較劉氏宋本爲佳

韓非子二十卷

明嘉靖刊本

祁曠翁藏書

周韓非撰此本前有韓非傳嘉靖辛酉五月端陽浙西張鼎文
序漢志史記列傳隋唐志皆云二十卷五十五篇而王伯厚獨
言今本五十六篇未知所定末有順齋張鼎文澂伯甫校刊小
本記盧紹弓學士嘗謂此刻脫文固多佳處頗有可爲定評矣
有澹生堂經籍記曠翁手識山陰祁氏藏書之章諸印

韓非子二十卷

明刊本

前後無序跋目錄五十五篇每半葉十行行二十字是亦從道
藏出者自乾道改元中元日黃三八郎印本重雕後世皆尙乾

道本然趙文毅所刻卽從乾道本山元和顧千里云前人多稱道藏本其實差有長於趙用賢刻本固不如宋槧但宋槧亦頗有誤一卷之中前作於象後作于象又何解也況千里所撰識誤仍多是藏本因知此本之善

韓非子二十卷

明刊本

盧抱經校藏

前有萬曆十年吳郡趙用賢撰序又韓子總評韓子凡例目錄五十五每卷仍有目錄接正文上眉列評語乾隆二十一年盧文弨以凌瀛初本對校四十二年又以馮已蒼所校張鼎文本校五十三年以保定知府黃策大字本校又注云已蒼以此本并葉林宗道藏本又秦季公又元齋本校取芝田張鼎文刻本張本固多脫文然頗有好處張本與道藏合者多有崑園黃氏收藏圖書印有文弨借觀印有數間草堂藏書印盧氏藏書文弨校正諸印蓋先借而後藏也

韓子二十卷

明天啟刊本

吳山尊藏書

錢塘趙如源濟之王道焜昭平同校

前有至元三年奎章閣侍書學士何忞序稱韓子五十三篇攷之班固藝文志韓子五十五篇今已亡其二篇又史記本傳小司馬索隱注有說林上下篇今止存上篇亡其下篇又第十卷內儲說下六微內亡去似類一章有反一章參疑一章其廢置章亦有殘缺不全與處士臣謙家藏本無異今因之不敢妄爲增定舊有李瓚注鄙陋無取臣忞盡行削去謹與臣謙攷讐畧加傍注旣成徵前漢劉向以殺青書可繕寫又有武林王道焜序稱余友趙濟之諸同社嗜書若渴尤嗜非之書始焉譽其謬舛已而彙諸家異同妥評之復請正諸先輩版行之其爲好亦已甚矣次有天啓五年錢塘趙世楷繩美重訂凡例五則并集趙用賢汪道昆孫鑣張榜陳深茅坤劉辰翁楊慎王維禎陳仁

錫諸家評詁於上方附錄史記韓非傳戰國策姚賈譖殺韓非
史記李斯勸行督責之術蘇軾蘇轍韓非論孔明寫申韓書昭
平先生殉已酉之難謚節愍此冊爲吳山尊甫先世所藏有題
誌稱又號抑庵全椒人嘉慶己未進士官翰林院侍讀學士

商子五卷

明刊本

秦商君公孫鞅著明錢塘馮覲晉叔點評

漢志稱商君隋志始稱商子皆載二十九篇今篇目二十有六
與晁氏讀書志合而第十六第二十一兩篇已有目無書元刊
外有范欽本秦四麟本此爲吾鄉馮氏評本前附史記商君傳
及嘉靖己未小海道入馮覲自序天啓丙寅覲之孫費始序而
刊行覲有廉訪使者木印其評點皆尙筆氣文法而其間錯誤
不能句讀者或圈以隔之豎以斥之與乾隆時西吳嚴萬里校
本往往多合

洗冤錄五卷

明刊本

朝散大夫新除直祕閣湖南提刑充大使行府參議官宋慈惠父編

右錄自條令至驗狀說凡五十有三條序文已佚 四庫從大典本輯爲二卷提要但言後來檢驗諸書大抵以是爲藍本耳嘉慶丁卯山東糧道孫星衍依元本校刊名曰宋提刑洗冤集錄目錄凡五卷與此脗合前有酒祐丁未嘉平節前十日自序云慈四叨臬寄他無寸長獨於獄案審之又審不敢萌一毫漫易心博探近世所傳內恕錄以下數家會而粹之名曰洗冤集錄刊於湖南憲治示我同寅此則明又翻元耳

棠陰比事一卷補編一卷續編一卷

舊鈔本

原編宋桂萬榮輯明吳訥刪正補編續編明吳訥輯萬榮鄞縣人由餘干縣尉仕至朝散大夫直寶章閣知常德府訥號思庵

常熟人永樂中以知醫薦官至右都御史諡文恪明史有傳是
集萬榮取和凝父子疑獄集參以鄭克折獄龜鑑比事屬辭仿
唐李瀚蒙求之體括以四言韻語自爲之注凡七十二韻百四
十四事訥刪存八十事又稍爲點竄其注有萬榮自序并跋補
編所載凡二十七事每事各有評語續編則載善可爲法者十
三人惡可爲戒者十人體例與補編同而無評語提要所載不
及續編此則三編俱全鈔寫精工可寶也

無冤錄一卷 明刊本

不著撰人名氏亦無序跋 四庫提要云永樂大典載此書題
元王與撰與籍字無攷卷中自稱昔任鹽官檢二孕婦事蓋嘗
令海鹽大典載其自序題至大改元之歲是爲武宗戊申年所
載多至元元貞大德間官牒條格又多引平冤錄洗冤錄之文
而稍爲駁正其論銀釵試毒非眞銀則觸穢色必變論自緝勒

死之分皆發二錄所未發

平冤錄一卷

明刊本

此書 四庫不收目錄自檢覆總說至發冢凡四十有三條版式與洗冤諸錄一律然無冤錄既引其文則所著當在前也目錄後有金陵書坊王慎吾重梓九字

敬由編十二卷

明刊本

明泥上寶子傳纂

前有子傳自序曰法不可假與眾爲平式敬由獄以長王國敬由之名殆取於斯上自唐虞下迄宋元凡治訟清刑可師可法者罔不臚列中州呂新吾司寇坤同彙次之萬曆辛亥子傳提刑於浙因刊於浙江按察司之種德堂儀曹郎武林黃汝亨爲之序

右法家類

子部四

農書三十六卷 明嘉靖刊本

東魯王禎撰

泰安府志王禎字伯善東平人官旌德令再調永豐書凡農桑通訣六卷農器圖譜二十卷穀譜十卷南北治農治蠶之法纖悉具備山東巡撫邵錫令布政司李緋顧應祥刊行蓋表章山左之著述也嘉靖庚寅山東臨清閭閻爲序後有顧應祥刊行文移一通內稱梨版刻字畫匠工食銀兩於司庫貯泰山頂廟香錢內動支通訣後載禎前任宣州旌德縣尹時方撰農書因字數甚多難於刊印故尙已意命匠創活字二年而工畢試印一如刊版古今此法未有所傳故編錄於此以待後之好事者爲印書省便之法本爲農書而作因附於後斯則續畢簡之舊法爲 武英殿聚珍版之先聲近外洋又創石印新法聚梨將

廢矣

野菜譜一卷 明刊本

高郵王磐鴻漸甫著郡人王應元一之甫校

前有嘉靖三年三月自序云正德間江淮迭經水旱饑民枕籍道路率採摘野菜以食賴之活者甚眾但其形類相似美惡不同誤食之或至傷生予雖不爲世用濟物之心未嘗忘田居朝夕歷覽詳詢得六十餘種取其象而圖之俾人人易識不至誤食且因其名而爲之詠備觀風之採並有存白山人李官序雖不及鮑山博錄然詩歌多寓規戒似謔似諺頗古質可誦

泰西水法六卷

明刊本 葛靖調藏書

泰西熊三拔撰說吳淞徐光啟筆記

一卷曰龍尾車用挈江河之水二卷曰玉衡車恆升車用挈井泉之水三卷曰水庫記用蓄雨雪之水四卷曰水法附餘皆尋

泉作井之法而附以療病之水五卷曰水法或問備言水性六卷則諸器之圖式也有萬應王子河東曹子沐上饒鄭以偉廬陵彭惟吳淞徐光啟諸序有華印局調氏二印

野菜博錄三卷

明刊本

汪氏裘村樓藏書

新安鮑山在齊編

草部上一百四十種草部中一百七十六種木部一百十九種皆可茹食備荒前有天啟壬戌香林主人序後有趙洪中程大中兩跋刊繪極工汪季青家收藏有晉賢鑒定圖書休陽汪氏裘村樓藏書印

右農家類

子部五

新刊補注釋文黃帝內經素問十二卷

明熊氏龍峯刊本

啟元子次注林億孫奇高保衡等奉敕校正孫兆重改誤

藏書志卷十六

七

前有唐寶應元年啟元子王冰序序後題將仕郎守殿中丞孫兆重改誤按昇陳兩志俱稱冰號啟元子而文獻通志作詠誤也林億宋嘉祐中官光祿卿見元至元嘉禾志孫兆爲太醫令用和之子見直齋書錄解題明史藝文志有孫兆素問注釋攷誤十二卷以兆爲明人誤也總目後有木記云是書乃醫家至切至要之文舊本昏蒙謬舛漏落本堂將家藏善本三復訂正增入運氣入室輿論重新繕梓釐毫熊氏種德堂識以平津館鑒藏記證之乃依元至元己卯萬節古林書堂據元豐孫校正善本翻刊者題稱元本二十四卷今併爲一十二卷刊行每半葉十三行行二十三字均與至元本合龍峰熊宗立乃明成化正統間坊賈也

重廣補注黃帝內經素問二十四卷

明嘉靖刊本

臚印持藏書

啟元子次注林億孫奇高保衡等奉敕校正孫兆重改正

前有國子博士臣高保衡光祿卿直祕閣臣林億等謹上表文
啟元子王冰自撰序文題大唐寶應元年後列孫兆高保衡孫
奇林億銜各四行後有嘉靖庚戌武陵顧從德識云家大人以
宋刻善本見授遂翻刻以承訓之私按宋史藝文志及晁陳諸
家著錄皆僅稱黃帝內經素問二十四卷而無重廣補注之名
陳氏書錄解題亦無孫奇與孫兆改誤之事大約皆明時所加
耳有嚴印持印調御兩印印持餘杭人善書工詩明末與聞子
將結社湖上與弟武順敕齊稱餘杭三嚴焉此書嚴氏舊藏不
知何年流售東瀛裝潢題面皆彼土所爲又不知何年仍歸杭
州楚弓楚得洵可寶也

京本校正注釋音文黃帝內經素問靈樞集注十五卷

明刊本

隋全元起訓釋唐王冰次注宋林億奉敕校正孫兆改誤閩潭城
趙植吾編正福書林詹林所重梓

前有唐寶應元年歲次壬寅序目錄第一卷至十二卷爲素問
八十一論篇第十三卷爲素問亡篇第十四十五兩卷爲靈樞
八十一章編次與他本不同殆福建書肆刻本有井家藏書印
殆曾至東瀛復歸中土者歟

補注釋文黃帝內經素問十二卷遺篇一卷

明趙府刊本

啟元子次注林億孫奇高保衡等奉敕校正孫兆重改誤

前有國子博士臣高保衡光祿卿直祕閣臣林億等撰序後題
朝奉郎守國子博士同校正醫書上騎都尉賜緋魚袋高保衡
都尉賜緋魚袋孫奇朝散大夫守光祿卿直祕閣判登聞檢院
上護軍林億三行又啟元子王冰撰序時大唐寶應元年歲次
壬寅後列將仕郎守殿中丞孫兆重改誤一條總目後元本二
十四卷今併爲一十二卷八十一篇原書刺法論篇第七十二
本病論篇第七十三亡在王注之前新校補爲遺篇一卷乃明

趙府居敬堂刻本每葉十六行行十七字注夾行行亦十七字

黃帝內經太素殘本二十三卷

日本寫本

通直郎守太子文學臣楊尙善奉敕撰注

此書全缺者卷一卷四卷七卷十六卷十八卷二十卷二十一其卷二缺末葉卷三卷六卷八卷十卷十二卷十四卷二十九卷三十缺首卷十七僅存尾三葉卷二十二首尾並缺全者僅十一卷耳唐書藝文志收入宋治平間林億等校正醫書太素亦在其列蘇魏公本草後序素問新校正及甲乙經校正引其說甚多郡齋直齋兩目已不著錄南宋時殆已湮佚此爲日本傳寫後記仁平元年仁安二年書寫校正等字按之中國年號乃紹興二十一年與乾道三年也

黃帝內經明堂殘本一卷

日本寫本

通直郎太子文學臣楊上善奉敕撰注

藏書志卷十六

九

前有自序云十二經脈各爲一卷奇經八脈復爲一卷合十三卷與唐藝文志楊上善黃帝明堂類成十三卷相合惜祇存肺經一卷其書取素問靈樞論穴針灸論治分十二經編類而音釋之上善嘗注老子道德經莊子老子指略論道德經三畧論今皆不傳此日本人從相傳舊本影寫蟲文穿穴悉依描摹末題寬元年號當在宋濬祐間鈔本流傳不得不謂之古矣

黃帝素問靈樞經十二卷

明趙府刊本

目錄後題元二十四卷今併爲十二卷計八十一篇又有宋紹興乙亥仲夏錦官史崧題云昔黃帝作內經十八卷靈樞九卷素問九卷世所奉行唯素問耳越人得其一二而述難經皇甫謐次而爲甲乙諸家之說悉自此始其間或有得失未可爲後世法僕本庸昧潛心斯道頗涉其理輒不自揣參對諸書校正舊本靈樞九卷共八十一篇增修音釋附於卷末勒爲二十四

卷除已具狀經所屬申明外准使府指揮依條申轉運司選官
詳定具書送祕書省國子監今崧專訪請名醫更乞參詳免誤
將來利益無窮云云此亦趙府居敬堂刻本惟按古黃周宏祖
古今書刻趙府凡刻書八種而無此目豈遺漏耶抑刻在成書
以後耶

黃帝素問靈樞十二卷

明刊本

前有紹興乙亥錦官史崧序云家藏舊本靈樞九卷共八十一
篇送祕書省國子監此書至南宋始出此明刊本書法圓潤或
前遺素問十二卷歟

脈經十卷

東洋活字印本

晉太醫令王叔和撰宋朝散大夫守光祿卿直祕閣判登聞檢院
上護軍臣林億等類次

卷首列校定進呈脈經劄子熙甯元年七月十六日進呈奉聖

旨錢版施行下列高保衡孫奇林億王安石趙抃曾公亮富弼
諸臣銜名又有紹聖三年六月牒文後列國子監書庫向中恕
曾綽鄧平郭直卿王仲凝檀宗益趙挺之龔用諸臣銜名阮文
達嘗從宋嘉定何大任刻本影鈔進呈 內府提要著於彙經
室外集此則日本活字印行者也

重刊巢氏諸病源候總論五十卷 明刊本

隋太醫博士巢元方撰

前有翰林學士兼侍讀學士玉清昭應宮判官尚書左司郎中
臣宋綬奉敕撰序明新安汪濟川江壠校刊也

孫真人備急千金要方九十三卷目錄一卷

明嘉靖刊本
燕館舊藏

陳氏紅

朝奉郎守太常少卿充祕閣校理林億等校正

按宋元本皆作三十卷目錄一卷此据道藏本分卷尚有字號
可按板心有小巨山房及喬氏世定刻行字前列真人本傳嘉

靖二十二年三原馬理序曰孫子之徒嘗刊是方於華表石上
豎之鑑山下漆沮合流路隅使人覽且鈔也今石存方失州人
傳爲某醫家所毀後遭雷禍方亦不存幸道藏無恙予承乏吏
部日嘗鈔傳之今萬石喬氏乃梓而傳之非孫子勒方華表意
耶喬氏嘗積粟數萬石薄取其息以賑饑人故遠邇歸德以萬
石君稱萬石君長子長甯官四川按察僉事次子世定忠傷寒
絕以待斂因祈祐於孫子之神矢以疾愈卽梓方於世旋數日
愈耀州喬世甯復爲之序此書通部以朱筆據元刻校正仍鈎
復三十卷之舊有陳氏藏書陳祖蕃印古歡氏諸印

銀海精微二卷

明刊本

舊題唐孫思邈撰唐宋藝文志皆不著錄其名乃取王安石論
蘇詩光搖銀海之語僞不待辨然五輪八郭總論及治目各法
乃多中理 四庫總目所收謂前有齊一經序稱管河北道時

得於同僚李氏亦不著時代年月莫知何人也世傳坊刻皆出齊本卽東瀛翻者亦然此猶明時舊刊攷一經山東萊州府平度州濰縣人中隆慶五年辛未進士管河北道當在萬厯間也

顏顥經二卷

陳簡莊鈔本

前錄原序後有乾隆五十三年三月海甯陳鱣跋云顏顥經二卷不著撰人姓名攷宋史藝文志始有師巫顏顥經二卷近世別無傳本惟永樂大典內載此書并无名氏序文一篇何穆王賢士師巫於啞峒得而釋之云云正與宋志相合殆卽是本然疑爲唐宋人所作託名師巫以神其說其曰顏顥者按說文顥顥首骨凶頭會幽蓋也又云兒孺子也从儿象小兒頭凶未合蓋兒之初生顥顥未合證治不同故取以名其書歟但此書沈麇已久今四庫全書館從永樂大典哀輯成書依宋志舊目析爲二卷鮑冬方託友亟錄以歸儻得好事者付梓以廣其

傳則誠求保赤其利甚溥不獨爲是書幸也

銅人鍼灸經七卷

明刊本

山西平陽府刊卷首題曰夫療病簡易之法必須鍼灸欲明鍼灸之方者必須注意於是經是經也得之祕傳治病則有受病之源指穴則有定穴之法效驗神速繡梓與眾共之衛生君子請鑒諸殆本之坊肆木記耳錢遵王云寶氏祕傳內有金津玉液大小骨空八風八邪髌骨八法此書與明堂灸經俱不載何耶

西方子明堂鍼灸經八卷

明刊本

敏求記曰西方子不知何解昔黃帝問岐伯以人之經絡窮妙於血脈參變乎陰陽盡書其言藏於金蘭之室洎雷公請問乃坐明堂以授之後世言明堂者以此今醫家記鍼灸之穴爲偶人點誌其處名明堂非也此爲山西平陽府重刊檢古黃周宏

祖輯古今書刻平陽府刊祇有銅人鍼灸經而未列此書按黃帝內經明堂十三卷取素問靈樞腧穴鍼灸論治分十二經編類而音釋之此明堂鍼灸經大約沿其名本其治耳

壽親養老新書四卷

元至正刊本

承奉郎泰州興化縣令陳直撰敬直老人鄒鉉編次玉臆黃應紫點校

按直於宋元豐間令興化著養老奉親書一卷自飲食調治至簡妙備急方凡十五事元大德中泰甯敬直老人鄒氏鉉字冰壑續增三卷一爲古今嘉言善行七十二事後兩卷詳載凡寢興器服餽粥飲膳藥石之宜及婦人小兒食治諸方凡二百五十六條前有至正壬午楊士宏序謂備員浙東憲使訪諸婺源教授李子貞得其書而鈔梓於學宮庶天下後世皆得觀覽以盡事親之道云

太乙博濟經效祕傳旅舍備要方一卷舊鈔本

宋董汲撰

前有自序曰汲白業醫以來收經效奇方計百餘道證詳而法略便覽者曉然可自用之曰旅舍備要方爲一卷庶幾道途疾病治療有歸不敢私隱具錄如左陳氏書錄題解董汲有小兒癰疹論腳氣治法而不及此書宋史藝文志列其目原本久佚輯永樂大典僅得五十餘方餘則無從較補也卷首旅舍備要之前一行題太乙博濟經效祕傳八字攷汲所著尙有小兒斑疹論腳氣治法二種併此而三迨汲總題以冠各書未離方技習氣歟

素問入式運氣論奧三卷黃帝內經素問遺篇一卷

明成化刊本

朝散郎太醫學司業劉溫舒撰

前有元符己卯溫舒自敘凡繪五運六氣樞要六十年紀運十

千起運十二支司天五行生死順逆論圖綴以論說素問遺篇
一爲第七十二刺法論一爲第七十三本病論孫淵如觀察謂
溫舒太醫學官所得內經亡篇必非無本者明成化間亦爲龍
峰種德書堂熊宗立重刊

傳家祕寶脈證口訣并方殘本三卷

東洋影宋本

宣德郎守殿中省尙藥奉御權太醫令充醫師上騎都尉賜紫金
魚袋孫用和集

按直齋書錄解題載孫氏傳家祕寶方三卷尙藥奉御太醫令
孫用和集其子殿中丞兆父子皆以醫名自昭陵時迄於熙豐
無能出其右者元豐八年呂惠卿從兆弟宰得而刻之兆自言
爲思邈之後晁氏志作十卷宋藝文作五卷此闕上卷乃日本
人影鈔宋本禮失求野此之謂矣

大德重校聖濟總錄二百卷目錄一卷

日本刊本

首載大德四年集賢學士嘉議大夫典瑞少監焦養直序及與
議版行醫愈郎諸路醫學副提舉申甫等十二銜名次載政和
原序云卷凡二百方幾二萬以病分門門各有論而敘統附焉
首之以風疾之變動終之以神仙服餌至於俞穴經絡祝由符
禁無不悉備初翻於金大定再刻於元大德 本朝程林得其
殘帙掇取其切於用者編爲纂要乾隆中潭濱黃氏嘗爲刊行
工未竣而中止震澤汪鳴珂與弟鳴鳳購得之乃偕程勛刊補
卒工始成全帙刪去符錄服餌二卷此爲日本文化十一年東
都醫學提舉司杉本良仲溫序刊完全不闕洵醫林大觀矣
重修政和經史證類備用本草三十卷 明翻金泰和刻本

成都唐慎微續證類中衛大夫提舉太醫學臣曹忠孝奉敕校勘
前有忠孝序文引用所出經史方書目錄又金泰和甲子晦明
軒刊書木記及成化四年涪安商輅序其自嘉祐以前所有本

草諸序皆載於卷一序例中而嘉祐間禹錫等進書奏敕又列於末不入序例其體例殊不畫一蓋宋金元明輾轉重刊互有增易故也按前書但著大觀之名並無政和之號且皆稱三十二卷或三十一卷而此獨三十卷并以重修政和標題又備用之稱與宋史備急之名互異以金泰和木記證之是明時別據泰和刊本重刻不以宋槧爲準故卷數標題各有盈縮異同耳然世傳本草書莫古於斯帙矣

重修政和經史證類備用本草三十卷

明嘉靖刊本

成都唐慎微證類中衛大夫康州防禦使句當龍德宮總轄修建明堂所醫藥提舉人內醫官編類聖濟經提舉太醫學臣曹孝忠奉敕校勘

前後序文金泰和木記證類本草所出經史方書凡二百四十七家均與前部同惟有萬曆十五年五月吉日御製前序後跋

及成化四年商輅序嘉靖壬子太倉王積江右漁浦項廷吉古杭馬三才嘉靖癸未廬陵陳鳳梧四序皆山東撫按等官蓋刻於山左者也字大悅目較前刻爲工

重刊經史證類大全本草三十一卷

明萬曆重刊大德本

唐慎微藥

前二卷爲序例上下衍義序例三卷以下則列藥名較金版本草多大觀二年又晟序又政和六年劄付寇宗奭又嘉祐二年補注本草奏敕三年圖經本草奏敕其艾序後亦有大德壬寅孟春宗文書院刊行木記蓋知南陵縣事楚武昌朱朝望據元本重梓者也又題春穀義民王秋原刊庠生王大獻引禮程文繡同校卷二前則標春穀王秋捐貲命男大獻大成同校錄則皆出資刊刻之人矣卷末有木記云萬曆庚子秋七月重鐫於籍山書院有彭端吾金鳳梅守德三序王大獻後序謹按 天

藏書志卷十六

十五

祿琳瑯書目後編卽收此刻也

類證增注傷寒百問歌四卷

元刊本

張蒼庵藏書

建甯府通守錢聞禮撰

前有乾道癸未中秋日龍溪隱士湯尹才序又淳熙壬寅夏韓王序詔宋樓藏爲影元鈔本前有至大己酉臘月圓日武夷詹清子子敬序此本闕張月霄案至元嘉禾志紹興三十年梁克家榜有錢聞禮未知卽此人否卷一爲傷寒辨惑論餘分九十類每類括以七言歌訣以便記誦注亦詳核後有女士席佩蘭題字佩蘭字道華號浣雲昭文人同縣孫原湘室工詩曾受業吾鄉袁隨園之門又有曾藏張荅鏡處一印

小兒衛生總微論方二十卷

明宏治刊本

前有嘉定丙午立春和安大夫特差判太醫局何大任序曰先君有小兒衛生總微論方二十卷家藏六十餘載不知作者爲

誰自嬰孩初育以至成童所謂保衛其生總括精微視古今方書極爲詳盡仁哉著書者之心也鈐於行在太醫局以廣其傳前列明宏治二年甯國知府天台范吉通判濟南朱臣二序宣城知縣濟南李延壽政稱昔有人得於古冢中以獻津要往往愈疾有奇驗因爲梓行改題曰保幼大全後列督工義官陳楨朱伯林耆儒耆老諸名有陸沆之印靖伯氏兩印陸蓋蘇人也

普濟本事方十卷續集十卷

東洋刊本

儀眞許叔微述續集題儀眞許學士述

首刻知可自序次爲日本人所錄乾道庚寅張刻序淳熙乙巳張孝忠序淳熙辛亥郡長吏任昌時序目錄後載事林廣記一則卷末載治制度惣例續集無序題爲證類普濟本事方卷末題享保廿一年向井人三郎刊行

普濟本事方十卷

舊鈔本

陳簡莊手校

儀真許叔微知可述

宋錢聞禮序云許叔微白沙人紹興中舉進士仕翰林學士所著醫書皆膾炙人口其後集成十卷名證治普濟本事方自序謂予年十一失怙恃痛里無良醫及長刻意方書誓以救物爲心今集已試及所得新意題爲普濟本事方孟啟有本事詩楊元素有本事曲皆有當時事實庶幾觀者見其曲折後錄嘉慶己巳黃復翁跋又嘉慶辛未陳簡莊手跋六則謂松江刻本不佳得此舊鈔較勝復從黃蕘圃借宋本前六卷題曰普濟本事方無證類二字首有自序目後有治藥制度總例手錄補入並朱筆詳校乃知此本與宋槧各方次第分量俱有不同宋本大字每葉十六行行十六字銖兩一二等字皆作壹貳九字盡書作圓敬字缺筆惜缺後四卷未能細勘其全又閱蕘圃藏書目有吳中老醫周蘊石家傳鈔本每葉二十二行行二十一字與

此本同亟借歸細勘佳處不少如橘皮誤桔皮凡凡誤兀兀第
九卷傷寒小注誤入本文乃用綠筆校正書遂完善後又見王
陳梁次辰刻本有吳趨吳瀚補鈔宋版錢聞禮原序爲黃氏所
無亟爲照錄按復翁所藏今歸碩宋樓攷其藏書記行款與陳
跋悉符而獨闕錢序則此書之精何亞於宋槧歟

大宋新修太平聖惠方一百卷目錄二卷

依宋鈔本

右宋太宗文皇帝太平聖惠方太平興國三年內出親驗名方
千餘首更詔醫局各上家傳方書命王懷隱王祐鄭彥陳昭遇
較勘編類治化三年二月癸未書成御製序引凡爲類六百七
十門方六千八百有四首疾證緒論品藥功效皆備載在內末
有福建路轉運司命將國子監太平聖惠方一部一百卷二十
六冊計三千五百三十九版對證內有用藥分兩及脫漏差誤
共一萬餘字各已修改開版並無譌舛於本司公使庫印行紹

興十七年四月日次有邵大甯宋藻陳睦黃訥范寅秩馬口官
銜六行每半葉十三行行二十五六字東源經籍訪古志宋槧
凡五十卷藏金澤文庫其餘五十卷亦據宋本補足此彼國從
而影鈔行款悉依原式天明元年彼土別有刊本今錄各序於
後以備參攷

醫說十卷 宋刊本 黃堯圃汪間源藏書

經籍訪古志載醫說第九第十兩卷宋槧本左右雙邊九行行
十八字版心下有刻手姓名卷末載嘉定甲申彭方跋嘉定甲
申李以制跋開禧丁卯江疇跋寶慶丁亥徐杲跋此本行款悉
合祇存彭李二跋及江疇跋七行後皆說前存目錄第十葉起
至三十葉前亦脫末有黃堯圃手題云余向觀書華陽顧氏見
有殘宋本復借余校本傳錄一本去冬顧氏原本歸余中多缺
失版心有莫辨處又從香巖借傳校本勘之知余校本多譌而

香巖承之謹就宋刻存者一字一句細校方可謝余前過而益
信書之不可不藏宋本也此時覆本不多見故用校宋者乃明
刻本明刻亦有二向用爲校宋者取明刻之差勝本然中多謬
誤校時不及檢點故承之也此書鈔補之處皆不可信萬一再
有全宋刻出始可補此殘缺不則此殘宋刻本不已爲希世寶
物耶余故樂得而收之又樂得而裝潢之丙子仲春復翁有迪
安堂書畫印長洲汪士鐘閩源氏印觀察使者三十五峯園主
人所藏諸印

醫說十卷 明嘉靖丙午刊校宋本

宋新安張景季明集

是編凡四十七門前七門總敘歷代名醫醫書本草鍼灸神醫
神方診法之類次雜證二十八門次雜論六門次婦人小兒二
門次瘡及五絕痺疔三門而終以醫功報應爲宋張杲撰而經

簫攷作張景豈字形同歟抑有所避歟果字季明其伯祖擴字子充學於范忠宣龐安時以醫名京洛間子充投其弟子發子發授其子彥仁杲彥仁子也嘗集古來醫案據其見聞勒爲是書季明之子字九萬肄業郡庠性敏能文其家學淵源者如此
清熙十六年羅頌序云季明盛年著書已酉歲攜以過我且曰書雖未成請姑爲序之嘉定甲申李以制跋云季明今老矣搜訪尙不輟則相距實三十有六年當是季明晚年定本是年三月先有星江彭方跋又有開禧丁卯建安江疇跋寶慶丁亥東陽徐杲跋而別本又有紹定改元山陰諸葛興跋稱越帥待制汪公鎮越一日出張氏醫說示興因辯其舛誤芟其顛云云是宋時已非一刻矣明嘉靖癸卯有鄧正初校刊本甲辰又有顧定芳刊本前爲諸葛跋末爲彭方江徐四跋丙午潘藩又刊有張子立序高節後序卽此本也今以黃萇圖跋藏宋本校正之

鍼灸資生經七卷 影寫元刊本

大監王公執中編

前有嘉定庚辰孟夏朔徐正卿序又醫官陳承裴宗元陳師文進書表上卷目錄後題曰古語云有方不傳謂之不孝西銘云民吾同胞痒疴疾痛舉切諸身服膺斯言欲廣是心卒莫能遂昨家藏宋南渡後新刊鍼灸四書及鍼灸資生經實上古賢聖活人之指南也凡診視脈息鍼灸俞穴具在此中然當世缺本是用梓行以廣其傳卷末題三峯廣勤葉景達重刊

太醫局諸科程文格九卷 舊鈔本

右爲宋紹熙二年後太醫局所置程文館臣從大典中排纂得墨義九道脈義六道大義三十七道諸方八道假令十八道運氣九道其文皆貫通三經及三部鍼灸之法暨金石之品草木之性辨晰精微足資啟發

新刊仁齋直指附遺方論二十六卷

明刊小字本

三山名醫仁齋楊士瀛登父編撰新安後學惠齋朱崇正宗儒附遺

前有景定甲子良月自序韻宋樓書目另有嘉靖間余鈹重刊序茲本無之豈刻本不同歟

新刊仁齋直指小兒附遺方論五卷

明刊小字本

三山名醫仁齋楊士瀛登父撰次新安後學惠齋朱崇正附遺
有景定庚申閏朔自序即仁齋直指序稱嬰兒指要也 四庫
未經著錄分類十二曰初生曰變蒸曰驚曰中風曰疳曰積曰
傷寒曰痰嗽曰脾胃曰丹毒曰雜證曰痘疹每類又各分子目
崇正所附間參以圖頗能補助誠保赤之良方也

新刊仁齋直指方論醫脈真經二卷

明刊小字本

三山名醫仁齋楊士瀛登父撰次新安後學惠齋朱崇正宗儒附

遺

是書 四庫未收前有景定壬戌七月既望士瀛自序脈訣一書世之宗叔和者尙矣叔和書雖僞出然以之爲經而參以百家諸說棄其謬而擷其精視瀕湖脈學殆無不及登父首著活人總括時在庚申越翌歲更著此書最後則仁齋直指也

新刊傷寒類書活人總括七卷

明刊小字本

三山名醫仁齋楊士瀛登父編撰新安後學朱崇正宗儒附遺

按仁齋直指序余始撰活人總括嬰兒指要俗皆譏以沽名是書爲登父最初著而 四庫轉附於直指之後登父本福州人此亦似麻沙所梓

急救仙方十一卷

明鈔道藏本

天一閣藏書

按 四庫本從永樂大典錄出作八卷不著撰人名氏此十一卷白棉紙藍格明鈔每卷題側一至側十一蓋道藏本款式檢

道藏目錄有急救仙方十一卷宋林億等校卷六有仙授理傷續斷祕方序卷十有上清紫庭追癆仙方論法老叟自序皆本之仙傳故入道藏耳有范氏梁父一印

辨惑論三卷

明刊本

東垣老人李杲撰

自序曰幼受難素於易水張元素先生稍有所得曾撰內外傷辨惑論一篇以證世人用藥之誤陵谷變遷忽成老境神志旣惰懶於語言此論束之高閣十六年矣崑崙范尊師屢以活人爲言謂此書果行使天下人不致夭折是亦濟人利物之事就令著述不已精力衰耗書成而死不愈於無益而生乎敬受其言力疾成之聊答尊師慈憫之志師宋文正公之後也

脾胃論三卷

明刊本

東垣老人李杲撰

前有元好問序云內經說百病皆由上中下三者及論形氣兩虛卽不及天地之邪乃知脾胃不足爲百病之始有餘不足世醫不能辨之者久矣往者遭壬辰之變五六十日之間爲飲食勞倦所傷而歿者將百萬人皆謂由傷寒而歿後見明之辯內外傷及飲食勞倦傷一論而後知世醫之誤人如此又著脾胃論此書果行壬辰藥禍當無從作藥刻絕精不減元本

蘭室祕藏三卷

明刊黑口本

馬笏齋藏書

東垣老人李杲撰

是書前列目錄自飲食勞倦門至小兒門凡分二十一類其脾胃虛損論極言寒涼峻利之害大旨主於培土似較劉張兩家流弊爲少也此明初刊本有馬玉堂印笏齋藏本兩印

醫壘元戎十二卷

明刊本

趙州教授兼提舉管內醫學王好古進之筌次

前有自序云予自河南與諸友兄弟等日從事於患難之場隨病察診逐脈定方開之劫之薄之發之以盡其宣吐之補之汗之下之以極其當攻守不常出沒無定不啻胸中自有十萬精銳其敵可卻其勝可決而其安可圖故曰醫壘元戎末有自記此書附於東垣十書之後著明一卷非此刻也

湯液本草二卷

明刊本

海藏王好古類集

好古受業於東垣老人前後自撰序三篇

太醫院經驗奇效良方大全六十四卷

明刊黑口本

奉政大夫太醫院院使吳興方賢纂集修職郎太醫院御醫臨江楊文翰校正

前有序云太醫院判方賢以醫書一集見示曰此前院使董宿所輯賢續而成之者董慮方書太泛欲斟酌損益約之於中顧

其書未備賢竊惜之間得御醫楊文翰相與重加訂正刪繁舉要慎於去取總六十餘類凡若干卷名曰奇效良方將繡諸梓以上裨聖覽下與四方君子共之其末一葉已佚不知序者爲誰每葉二十六行目錄上中下三列約膏九湯散等七十餘方凡目錄七十七葉計方六千有奇按明史藝文志方賢奇效良方六十九卷則此尙缺五卷然目錄後無書賈裁匿之跡書中稱中書右丞相合剌孫至元癸未季春奉敕治之癸未爲元世祖二十年則賢乃元初人明史誤收其著述也

世醫得效方二十卷

舊鈔本

元危亦林撰

前有至元三年後學達齋自序按達齋南豐人官本州醫學教授是編積其高祖以下五世所集醫方合而成之其高祖遇仙人董奉二十五世孫傳其祕方可謂其傳有自有宋建和舊山

樓兩印

格致餘論一卷 明刊本

金華朱彥修撰

前有飲食色欲箴意主陽有餘陰不足立論自序云古人以醫爲吾儒格物致知一事故曰格致餘論至正七年金華宋濂序彥修名震亨許文懿公之高弟公講學華山時卽從之游問道最先醫特其一事云

局方發揮一卷 明初刊本

金華朱彥修撰

用修因和劑局方不載病源止於各方下條列證候立法簡便而未能變通因一一爲之辨論大旨在於闢溫補戒燥烈宗其法者惟以黃蘗知母爲療病要藥戕傷元氣而人之天枉愈多矣故張介賓力闢其謬遂集矢於用修然用修之學出於劉完

素有所稟承不得因末流之病而廢之也

類編南北經驗醫方大成十卷

明初刊本

文江孫允賢撰

首有本記云醫方集成一書四方尚之久矣蓋所謂濟生拔萃
宣明論瑞竹堂張子和徐同知計方尤爲切要所不可遺本堂
今得名醫選取奇方增入孫氏方中俾得通貫名曰醫方大成
重新繹梓云云末有明治丙子古稀老人枳園題云明熊宗立
醫學源流云孫允賢文江人元仁宗延祐中選醫方集成予先
祖彥明公復選宣明拔萃等方而附益之是謂醫方大成則其
爲彥明增輯之本惟第九卷仍題醫方集成豈孫氏原目刊改
未淨耶有森氏開萬所府之記一印當亦東瀛所鈐

外科精義二卷

明刊本

汲古閣藏書

醫學博士選充御藥院外科太醫齊德之纂集

宣投保全郎陝

藏書志卷十六

三

西等路醫局提舉馬雲卿校正

此書上卷論法治下卷列療疾各方吳氏醫統亦有刊本此爲
明初所刊卷首有海虞毛晉子晉圖書記朱文方印

醫經溯洄集一卷 明初刊本 怡府藏書

魏博王履著

按履字安道崑山人學醫於朱丹谿盡得其術明初始卒明史
入方伎傳實元人也書凡二十一篇闡發明切者如亢則害承
乃制及四氣所傷皆前人所未及李濂醫史有履補傳載其著
述始末甚詳有怡府世寶明善堂覽書畫印記二方

新刊袖珍方大全四卷 明宏治翻洪武本

是書著於天祿琳琅云不著撰人名氏惟序稱周王纂命序
梗槩作序者自署名佑而無姓攷明周定王棣有普濟方或其
所刪節別行者書四卷薈萃古今各方分證類載極爲精密序

後有識盛稱是書之善而遠方難觀里人劉文英於京師求得之宗立校讐付梓云云熊宗立字遊軒建陽人此本爲建陽麻沙版式或卽宗立以普濟方摘爲是書也今按前有洪武二十四年八月望日周王序邇來雲南一載有餘詢及醫書十無七八察其人病或祭神祀鬼間有病者求藥而里無良醫或恣其偏僻之見求爲殊異之方造次用行死者多矣乃於暇日集錄經驗諸方始成一書名之曰袖珍命工刊梓以廣其傳又序云嘗集保生餘錄普濟等方方雖浩瀚編輯多譌至洪武庚午寓居滇陽得家傳應效者令本府良醫編類鈐諸小版分爲四卷方計三千七十七門八十一名曰袖珍其後序乃洪武壬子典寶臣瞿佑作也末有正統十年熊宗立識語又有宏治乙丑仲春吉旦集賢書堂校正新刊本木記蓋天祿所藏本遺去周王兩序及瞿佑序之後葉致未詳敘耳

玉機微義五十卷

明正統刊本

此書有洪武丙子吳陵劉純序云始純從學江左馮先生庭幹嘗授以會稽徐先生所著一帙究探古今源義撫劉守真李明之朱彥修諸氏論集本平經旨而折衷其要先生諱彥純字用誠以春秋教授鄉之俊彥今沒十有二年是著書猶在元季又有吳興莫士安序稱劉宗厚氏所著玉機微義雖門分類彙固集方之不可同日語也又有正統己未少師兵部尚書廬陵楊士奇序都御史姑蘇陳公有戒填撫陝西蘇息彫弊遇此一編謂可濟人捐俸刻布今館臣直題徐用誠撰劉純續增本名醫學折衷凡十七類純爲未備增爲三十三類改題此名康熙癸未張延綏沈廷颺重刊尙精然不及此之善

仙傳外科集驗方十一卷

明鈔道藏本

天一閣藏書

沒儀原陽子趙宜真集

前有洪武戊午宜真自序云外科集驗方乃禾川楊清叟所編述以授吳甯極甯極之子有章以授西平善觀李先生先生以授於宜真者其方簡要借未版行吾徒蕭天倪其師弟致柔數年苦瘡諸藥不效因以此方授之用返魂湯未終劑而愈天倪乃捐貲繡梓散施流通其惠濟之意如此廬陵吳有壬同時撰序此亦天一從道藏鈔得者卷一至十一題造一至造十一

嬰童百問十卷

明刊本

魯伯嗣學

嘉靖十八年二月太子太保吏部尙書臣許讚奏稱臣係河南靈寶縣人正德二年爲翰林編修時收得嬰童百問相傳爲在昔名人著述乃以嬰童各證設爲百問每問必究其受證之原每證必詳其治療之方觀形審勢因病投藥極爲詳備此書原刻於陝西藍田縣今乃少見伏望敕付所司再加詳校刻爲善

本隨奉旨著禮部校正刊行而嚴嵩爲之序范氏天一閣書目
列爲五卷此則析爲十卷

衛生易簡方十二卷

明嘉靖刊本

永樂二十一年七月初四日欽差禮部左侍郎臣胡濙上進書
表稱幸沐寵榮而任使俾馳輶傳以諮詢訪緝搜求經十七載
討論講究閱千萬人網羅南北之奇良蒐輯古今之秘要取其
省易不特便於旅途拔其精華實有利於人已謹集易簡諸方
少資惠安萬姓舊分元亨利貞四卷黃氏千頃堂書目云濙爲
禮部侍郎出使四方輯所得醫方進於朝一作十二卷是也卷
後有濙自誌長沙夏原吉安楊榮永嘉黃淮並爲序此嘉靖
四十一年正月十八日禮部左侍郎兼翰林院學士臣李春芳
右侍郎臣董份等遵旨校刊印裝進呈奉旨是方書刻成於民
有濟各賞銀段

鍼灸問對三卷

明刊本

鳴野山房藏書

新安祁門朴墅汪機省之編輯

前有自序姑蘇凌漢章熟於穴法雖隔衣鍼亦每中穴是尙簡
略六合李千戶凡用穴必折量以墨點記方始下鍼是尙謹密
簡略者終不及謹密之的確但素難所論鍼灸必須察脈以審
其病之在經在絡又須候氣以察其邪之已至未來不知二家
亦皆本於素難否乎因取靈樞素難及諸家鍼灸之書窮搜博
覽日逐筆錄設爲問難著之又謂鍼能治有餘之病不能治不
足之病詳辨內經虛補實瀉之說乃指虛邪實邪非指病體之
虛實旨哉言乎宜明史之入方技傳也其書亦門人陳桷較刊
有鳴野山房印

明醫類案十二卷

明萬曆刊本

鮑氏知不足齋藏書

明新都篁南江瓊集長子應元校正次子應宿述補

藏書志卷十六

三

前有嘉靖壬子南京禮科給事中游震得序南京國子祭酒同邑張一桂序萬曆丙戌武英殿大學士太子少保禮部尙書邑人許國序稱葦南故爲諸生會多病去而爲醫其子南仲世其業並以醫名邑中嘉靖己酉秋瑾自序萬曆辛卯男應宿跋有凡例九則述補二則其所採治驗自史記所載秦越人治于意華陀諸人下迄元明諸名醫摺摭殆徧分二百五門各詳其病情方藥瑾所評論亦夾注其下其子應宿醫案亦附之同邑鮑廷博乾隆三十五年重刊是書以此帙爲底本尙存手筆於目錄之後有親仁堂印

神應經一卷

明刊本

汪季青舊藏

宏綱先生陳會善同撰醫士臣劉瑾永懷重校

提要謂會瑾均不知何許人瑾冠臣字亦不知何時進御宦官劉瑾以謀逆伏誅斷無人襲其姓名此書當在正德前矣舊爲

朱彝尊藏本當時傳寫譌謬館臣故曰不甚可據今係刊本前有仁宗洪熙乙巳四月二十一日序文云宏綱遇信卿席真人所授之術故其補瀉折損之法其口訣指下之妙與世醫之所不同出於人者見於此也其徒二十四人獨劉瑾得其指下之祕乃命重校其師宏綱所傳廣愛書十卷子止取其穴之切於用者爲一卷更其名曰神靈經有木印曰咸躋壽域又有御押似館臣所未見也洪熙繼永樂是爲仁宗在位止九月此序作四月二十一日其去五月帝崩不遠矣舊爲休甯汪季青家藏醫林繩墨八卷

明刊本

錢塘醫士方隅著集醫官方穀校正

前有萬曆甲申仲秋穀序云繩墨一書爲後學習醫之龜鑑非穀之私意也今豚兒立志集成方論一冊壽之梓與天下後世共之

醫書六種

明刊本

一曰脈賦王叔和脈訣劉三點脈訣後有嘉熙五年上巳後學
劉開述一條一曰用藥歌訣一曰藥性賦附珍囊一曰傷寒活
人指掌提綱一曰諸病論一曰難經各書不著撰人名氏各無
序跋刻法精工印本佳好冊面藍綾書簽白絹當爲明經廠所
造之書

重刻安驥集五卷

明宏治刊本

汪魚亭藏書

古唐洞羊賈誠校勘

按四庫存目安驥集三卷永樂大典本不著撰人名氏前有
偽齊劉豫時刊書序凡病有各圖藥方附末其所載王良百一
歌及伯樂畫烙圖十二經絡圖馬師皇五臟論八邪論大抵方
技依託然其來已久云云此則宏治十七年陝西苑馬寺卿太
原車霆所刊五卷本霆序云黃帝八十一問以來其訂馬骨相

論馬證治施鍼用藥爲馬醫者莫之能違我國家以關陝爲西北重地設寺監以司馬政苑牧有地孳息有制防邊固國之計至矣永平日久視馬政爲常事南京太常卿邃庵楊先生進都御史督理其事寔始被委清理顧安驥集版久漫滅先生乃取善本校閱鉅梓遍給監苑衛所邊堡俾調養有法醫療有方矣仍刊僞齊阜昌五年降付劄子進呈安驥集方四冊奉齊旨看詳開印施行等文及旋毛口齒諸圖三十六黃病源黃帝八十一問諸歌實非方技所依託也有汪魚亭藏閱書印

右醫家類

善本書室藏書志卷十六終